

Date – 13/01/2026
Time - 7:30 -7:40 Hrs
AKASHVANI AIZAWL

REGIONAL NEWS BULLETIN

HEADLINES (MORNING)

1. Chief Minister Pu Lalduhoma'n an party-a awm zawng zawngte, an zavaiin ngaihdam ngai apiang inngaidamin kum thar chu inremnaa bul tan puiah a sawm.
2. Kumthar 2026 atan nimin khan political party te chuan an office an hawng tan.
3. Prime Minister Narendra Modia chuan ramchhunga thalaite theihna Yuva Shakti chuan ram hmasawna kawngah a thawhhlawk a ti.
4. India leh Germany chuan thawhdunna nghet zawk neih relin inremna thuthulng MoU 19 an ziak thar.

<><><>

CM

Chief Minister Pu Lalduhoma'n an party-a awm zawng zawngte, an zavaiin ngaihdam ngai apiang inngaidamin kum thar chu inremnaa bul tan puiah a sawm.

ZPM Party Office nimina Aizawlah neihah thusawiin ZPM Leader chuan ZPM sawrkarin sawrkar hmasate leiba avanga harsatna an tawhte chu sawrkar lola awm leh zel turten an tawh ve loh nan theihtawp an chhuah dawn a ti.

Pu Lalduhoma chuan ZPM sawrkarin kum 2 an sawrkar chhungin sawrkar hmasaten leiba an neih committed liability cheng nuai 6,311 an pek tlâk tawh thu leh pek hmabak cheng nuai 7646 ala awm thu a sawi a; ZPM sawrkar chuan an sawrkar loh hnua sawrkar turten leiba an chhawm ve loh nan hma an lak dawn thu a sawi.

Sawrkar hmasa ten committed liability hmangin leiba cheng engemawzat an hnutchhiah a; administrativa approval pawh awm lo, expenditure sanction leh work order pawh awm loa tawngkaa hna inpek, record a chuang lo a tam thu sawiin harsatna a tam phah hle tih a sawi.

Sawrkarna an siam hnua committed liability hnuaiah PWD Department leiba cheng nuai 1287 an pek tawh thu leh pek hmabak cheng nuai 583 ala awm thu Pu Lalduhoma chuan sawiin PHE Department hnuaiah leiba cheng nuai 4,842 an rulh tawh thu leh rulh hmabak cheng nuai 5,801 ala awm thu a sawi a, heng rulh hmabak la awmte hi kum 3 chhunga rulh zawh an tum thu a sawi.

Chief Minister chuan committed liability hnuaia Power & Electricity Department leiba cheng 182 an pek tawh laiin pek hmabak cheng nuai 1262 ala

awm thu a sawi a; P&E Department leiba la awmte hi kum 2 chhunga rulh zawh an tum thu a sawi bawk.

<><><>

DM& R

Disaster Management & Rehabilitation Minister Prof.Lalnilawma chuan Kar kalta Zirtawp Ni tlailam dar 3:30 vela, Sihphir Neihbawih-a quarry min chu nimin khan a tlawh a, Chhiatna thleng chu pawl a ti thu leh chhiattawk te chhungkua leh sihphir khawtlang a tawrhpu thu sawiin, mi 2 a chhilh bo te lakchhuah tuma theitawp chhuaha thawktu Sihphir khawtlang, CYMA te bakah sawrkar department.QRTleh NDRF te chungah lawmthu a sawi bawk.

He quarry min hi sawrkar in a hriat ve leh ADDMA leh DM&R official te, Quick Response Team(QRT) leh National Disaster Response Force(NDRF) te a hmunah a tir nghal a. QRT leh NDRF te hi CYMA leh Sihphir khawtlangin a tul ang angin an lo puibawm bawk. Mi 2 te lakchhuah hnatawh mek hi DC office, DM&R dept. leh Geology & Mining Dept. official ten a hmunah an vil reng bawk a ni.

He Quarry min hian mi 4 delin, Pu Muana (Manipur) chu a thi a, hliam tuar mipa pakhat damdawi ina enkawl mek a ni a. Mi 2 te erawh quarry min hian chhilh bo vin, tun thleng hian an la zawng hmu lova, heng mi 2 te hi Chakma leh Jharkhand state mi nia hriat an ni.

Quarry min hi Home Minister Pu K.Sapdanga leh Forest Minister Pu Lalthansanga te pawhin lo tlawh tawhin, Sihphir khawtlang hruaitu te hnenah hian thingpui lumna tur sumfai te pawh an lo hlan tawh bawk a ni.

<><><>

POL PARTIES REOPENS OFFICE

Kumthar 2026 atan nimin khan political party te chuan an office an hawng tan a,

MNF Party chuan Hnam Run hawanna hun hi vawiin khan hmangin, Party President Pu Zoramthanga Manganna hrang hrang kara kum 64 MNF hruai tawhtu Pathian chuan MNF chu kawng laklawhah a kalsan lovang a ti a. Pathian vuan a amah inngat tlat a pawimawh a ni a ti.

Pu Zoramthanga chuan, India ram leh Mizoramah pawh Party tam tak an ral tawh laiin MNF chu Mizoramah pawh party ruhrel lian ber a ni mek a ti a. 'Pathian leh kan ram tan' tia an din tlatna chu an felnaah Pathianin a ruat a ti.

Hnam Run hawanna inkhawm ah hian Kumthar atana Pathian hruaina dila tawngtai rualna hun hman niin, Martar-te sunna hun hman a ni bawk a ni.

BJP Mizoram State Office , Mipui Rûn pawh nimin khan hawngin State President Dr K Beichhua, MLA chuan Party mite fuihna thu a sawi a, kum 2026-a BJP te kal dan tur ah fimkhur a pawimawh hle a, Pathian lam en a, Pathian ring chungin an kal zel anga, a kaihhruaina hnuaiah lungrual takin an kal zel dawn a ni," a ti.

Pu Beichhua chuan, Aizawl Municipal Corporation tih chakna tur atan BJP Party an pawimawh a ni tih an hriat a, Mizoram khawpui Aizawlah AMC kaltlanga mipui rawngbawlina hna thawk tur leh Mizoram hmel lanna Aizawl Khawpui ah hmasawnna nasa zawk a lo thlen zel theih nan hma an lak nasat a pawimawh a ti bawk.

<><><>

MPCC

Mizoram Pradesh Congress Committee MPCC te chuan Kum 2026 atan nimin khan Bhawan hawngin Aizawl Municipal Corporation Ward thenkhat a AMC candidate tur an puang nghal.

MPCC President Pu Lal Thanzara chuan thusawiin ZPM sawrkar chu mipui beisei an pha lo hle a, Term kal ta lamah MNF an sawrkar a mipui beisei an pha chuang lova, tun din hmunah mipui beiseina awmna chu Congress party hi an ni a ti a Chumi tihlawhtling tur chuan party miten theih tawp kan chhuah a ngai a, thingtlang lam a mipuite manganna ata khai chhuak turin an party chu an tanrual a pawimawh a ni a ti.

Kum 2025 chung khan inthlanna hrang hrangah, a hma kum ai chuan hma an sawn hle tih sawiin theih tawp chhuah a an beihzel chuan hmalam an pan zel ang a ti.

MPCC President kalchhuak ta Pu Lal Thanhawla nupui Krismas hmaa a thih avanga an khawharna leh lungngaihna te hriatpui a hnem tu zawngte chungah lawm thu a sawi tih a sawi bawk.

Pu Lal Thanzara hian AMC Election 2026 lo awm tura Candidate puan thawh khatna atan mi 13 hming a puang a ni.

<><><>

BIRTH & DEATH

Mizoramah nikum January-October (thla 10) chung khan nau piang 18,210 leh mitthi 6,794 an awm a; thla 10 chungah naupiangah hian hmeichhia aiin mipa an tam zawk a, mitthi zingah hmeichhia aiin mipa an tam zawk bawk a ni.

Economics & Statistics department-in rural registration unit 633 leh urban registration unit 290 atanga thi leh piang zat (vital report) an dawn tawh chin an tarlan danin, nikum January-October thla chung khan thingtlang (rural area)-ah nau piang 6,793 leh khawpui (urban area)-ah nau piang 11,417 an awm a; naupiang 18,210 zinga 9,226 hi mipa niin, 8,984 chu hmeichhia an ni a, hmeichhe naupiang aia mipa naupiang tamna hi 242 a ni.

Thla 10 chungah mitthi zat hi rural area-ah 2,286 a ni a, urban area-ah 4,508 niin an vaiin mi 6,794 an thi a; mitthi te hi mipa 4,371 leh hmeichhia 2,423 an ni a, hmeichhe thi aiin mipa thi hi 1,948 laiin an tam zawk a ni.

Thingtlang-ah hian kum 1 hnuai lam thi 83 an awm a, kum 1-5 inkar thi 28 leh thisaa naupiang 25 an awm. Urban area-ah kum 1 hnuai lam thi 120, kum 1-5 inkar thi 10 leh thisaa naupiang 73 an awm bawk.

Economics & Statistics department-in nikum record a tarlan tawh chinah Mizoram pumah nikum thla 10 chhung khan kum 1 hnuailam thi 203-te hi mipa 114 leh hmeichhia 89 an ni a; kum 1-5 inkar thi 38-te hi mipa 22 leh hmeichhia 16 niin, thisaa naupiang 98-te hi mipa 54 leh hmeichhia 44 an ni.

<><><>

SERCHHIP

Serchhip khawpui luh dawna I LOVE SERCHHIP tih chhinchhiahna tichhetute chu Serchhip Police ten an man.

I LOVE SERCHHIP signage-a hawrawp E & S te chu a chhia tih hmuhchhuah niin Deputy Commissioner Office, Serchhip District chuan a tichhetute man chhuah an nih theih nan Serchhip Police Stationah rang takin FIR an thehluh a. Serchhip Police Station ah BNS thubuai ziahlul nghal niin chak taka chhui zui nghal a ni a, rinhlelh thu ah mi pahnih- Serchhip Field Veng leh Serchhip Hmar Venga chengte chu man an ni a. He sign hi an tihchhiat ngei a nih thu an inpuan hnuah, an pahnih hian District Jail ah dahluh an ni.

I LOVE SERCHHIP tihchhiat chungchangah Serchhip DC Pu Paul L Khuma chuan Serchhip Beautification Project hnuai hmalakna peng hrang hrang te mai bakah, sawrkarin mipui tana ruhrel a din te reng reng hi mipui ta a nih anga neitu thinlung nen enkawl turin District mipuite a chah a. Vantlang hmun pawimawhte tihmelhem leh tihchhiat chu danin a khap a, phalna la hmasa loa mimal leh pawlhoin lo tihdanglam pawh dan bawhchhiatna a nih thu DC chuan mipuite a hriattir nawn leh a. Hetiang thil a thlen tawh lohna tur leh, vantlang thil tihchhiat avanga hrem ngai an awm tawh loh nan thawhhopuia mi tinte a sawm a ni.

Hetihlai hian, Aizawl leh Lunglei inkar kawngpui ATL Road siam mekah an kawng siamna khawl Pukpui, Lunglei daia an dah chu mi tu tih hriatloh in lo suasa in, khawl thenkhat electric wiring lo tan chhia in an ru bo a.

Heng bakah hian diesel litre 100 vel bo telin Lunglei-PS ah FIR thehluh a ni a. Thubuai bawhzui hian nimin khan he pawikhawihnaa inhnawnawih rinhlelh T.Lalrinmawia (39) Pukpui, Lunglei a khawsa ni a inchhal chu man a ni. Thu zawhfiah anih hnuah pawikhawih naah hian a inhnawnawih ngei a ni tih police hma ah a sawi a, thu zawh fiah chhonzawm niin, thil tul angte tih chhonzawm zel a ni .

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

KHANKAWN MHIP

Champhai District, East Tuipui biala Khankawn Branch Mizo Hmeichhe Insuikhawm Pawl (MHIP) member te chuan MHIP thiltum, TANPUI NGAITE TANPUI tih hlawhtlinna atan hma lak nise tia kumin kum

tira thutkukna an lo siam tawh bawhzuiin nimin khan ah thing phurh hnatlang an huaihawt a , An thing phurh chu Parawl, stroke avang a eng hna mah thawk thei tawh lo te, Kum Upa tawh chhugkaw hnih te leh Hmeithai, Thingtuah la hlei thei tawh lo in hnih te an pe. Khankawn MHIP member 56 te hnatlangin an thawkchhuak thei a ni.

<><><>

PM

Prime Minister Narendra Modia chuan ramchhunga thalaite theihna Yuva Shakti chuan ram hmasawna kawngah a thawhhlawk a ti. Nimina Viksit Bharat Young Leaders Dialogue kharnaah he thu hi sawiin Pu Modia chuan thalaite ngaihtuahna thar, an thahrui leh an tum sang tak chu ram indinchhoh zelnaah a pawimawh a ni a ti a. Young Leaders' Dialogue chu thil chhinchhiahtlak tak anih thu sawiin ramchhunga thalaiten ram hmasawna kawnga an tha an thawh ve theihna awlsam tak a ni a ti bawk.

Puan tawh angina Swami Vevekananda piancham National Youth Day ah Young Leaders' Dialogue kharna hun hi hman a ni a.

Ramchhung hmun hrang hrang atangin thalai thlanbikte he hunah hian an kalkhawm a ni.

<><><>

PM & GERMAN CH

India leh Germany chuan thawhdunna nghet zawk neih relin inremna thuthlung MoU 19 an ziaak thar. Nimin khan Gandhinagar-a Mahatma Mandir-ah Prime Minister Narendra Modia leh German Chancellor Friedrich Merz te ram aiawhin an inbia a. Hemi hnu hian inremna thuthlung hi ziah a ni a, hei bakah hian ralthuam siamna kawngah nasa zawka thawhdun anih tur thu an puang a ni.

Tun tum hi German Chancellor Merz hian India a lo tlawh vawi khatna a ni a. Hruaitu pahnihte hian sector hrang hranga India leh Germany thawhdunnate an sawidun a. Kumina kum 25 tling tur India-Germany Strategic Partnership chungchang pawh an thlirlet a ni.

Inremna zingah hian sumdawna lamte, sum peipunna investment leh tunlai thiamna changkang high-end technology lamte sawi a ni a. Hei bakah hian ram venhimna lamte, boruak ti chhe tlem hmasawna leh science leh zirbingna lam pawh sawilan a ni a. Khawvel thil thleng pawimawh tak takte an sawilang bawk a ni.

Thuchhuah intawm an siamah Prime Minister Narendra Modia chuan India leh Germany te chuan firfiakte do kawngah lungrual takin an thawk dun tih a sawi a ni.

<><><>